

Saopćenje povodom objavljivanja Izvještaja revizije učinka

Ured za reviziju institucija u Federaciji Bosne i Hercegovine proveo je reviziju učinka na temu „Planiranje Budžeta Federacije Bosne i Hercegovine“. Cilj revizije bio je ispitati da li su Vlada FBiH i Federalno ministarstvo finansija osigurali efikasno i efektivno planiranje Budžeta FBiH, u cilju smanjenja budžetske potrošnje i smanjenja zaduživanja FBiH. Ispitivanje je fokusirano na vremenski period od 2013. do 2015. godine.

Odgovorno planiranje i upravljanje Budžetom FBiH pretpostavka je za stvaranje opće finansijske stabilnosti i dovođenje javne potrošnje u realne okvire. Porezni obveznici, građani i cjelokupna zajednica u FBiH očekuju da se korištenje javnog novca planira sa dužnom pažnjom i za osiguranje ekonomskog razvoja.

U posmatranim godinama revizije, plan prihoda Budžeta FBiH imao je negativan trend, dok je plan rashoda i izdataka kontinuirano rastao. Prilikom planiranja prihoda i primitaka, **Vlada FBiH i Federalno ministarstvo finansija, nisu planirali mogućnost unapređenja naplate budžetskih prihoda, nego su kontinuirano planirali povećanje primitaka od zaduživanja.** Tako je učešće planiranih primitaka od zaduživanja poraslo sa **19%** ukupnog Budžeta FBiH za 2013. godinu (2.214 miliona KM), na **29%** Budžeta FBiH za 2015. godinu (2.234 miliona KM).

Također, Vlada FBiH i Federalno ministarstvo finansija **nisu ispoštovali svoje postavljene prioritetne ciljeve u pogledu restriktivne budžetske potrošnje** nego su, u posmatranim godinama, planirali povećanje budžetskih rashoda i izdataka. Planirani izdaci za dugove i kamate porasli su sa **36%** Budžeta FBiH za 2013. godinu, na **41%** u 2015. godini. Kako bi se mogle redovno servisirati obaveze po osnovu otplate ranije uzetih kredita, Budžetom FBiH za 2015. godinu planirano je novo zaduženje FBiH u iznosu od **684 miliona KM.** **Ured za reviziju cijeni da postojeći način finansiranja Budžeta FBiH nije održiv, jer se kontinuirano planira povećanje zaduživanja, uz neizvjesnu mogućnost otplate dugova.**

Mišljenje Ureda za reviziju institucija u Federaciji Bosne i Hercegovina je da postojeća politika restriktivne budžetske potrošnje nije dala dovoljno rezultata, kako bi se budžetski rashodi smanjili na nivo realno prihvatljivih, a uzimajući u obzir prihode Budžeta FBiH i planirane izdatke za otplatu dugova.

Ovakav način planiranja Budžeta FBiH **rezultirao je povećanjem zaduživanja FBiH, da bi se nadomjestili nedostajući prihodi, pokrili rastući budžetski rashodi i izdaci i tako osigurala budžetska ravnoteža.** Slijedom navedenog, **revizija je zaključila da Vlada FBiH i Federalno ministarstvo finansija nisu osigurali efikasno i efektivno planiranje Budžeta FBiH.**

Sarajevo, 16.06.2017. godine